

"PRIAGU PE TIA CARA TERRA MIA" DI GIOVANNI LUZZI



Lu mio cuari ciangia lacrimi d'amuri e io priagu sempe, mio Caru Signuri.

*Di 'sta Terra mia bella e dannata
non fare finta ca ta si scordata!*

*Guardala cu 'n' uacchju di benevolenza,
mai tanta misiaria cu tant' ignoranza.*

*Pigghjati tutta quanta la cazzuneria
e lu sangu amaru dassamillu a mia!*

*L' orgogliu e 'sta bejizza dassandilli;
strafuttenza e pregiudizi pigghjatilli!*

*Lu mio cuari ciangia lacrimi d'amuri e io priagu sempe, mio Caru
Signuri.*

*La hacisti e tanta cura 'nci mentisti,
mò, vinne lu tiampu chi ti pentisti.*

*Fuarzi fuarzi lu stai faciandu apposta
pemma ndi duni 'na bella batosta!*

Truappu lu hjàtu chi, secundu mia, mentisti!

Truappu 'ncazzusi e arragiatizzi ndi hacisti!

*È buanu ca puru tu ti riendi cunttu
ca fa male assai 'stu risentimiantu!*

*Lu mio cuari ciangia lacrimi d'amuri e io priagu sempe, mio Caru
Signuri.*

*'Sta bella Terra non l' abbandunare
e lu culuri di lu mare non cangiare.*

*Fai 'mu si sente 'nu hjávuru i giardinu
cu 'nu profumu i hjúri i rosa finu finu.*

*Guarda e vidi ca "'ncunu" vole 'mu 'nd' allorda;
mandanci 'na benediziuani ca' no' s'a' scorda!*

*Di tiasti tuasti 'nda facisti a non finire
e li sacciututtio no' si 'nda vuannu jire.*

Lu mio cuari ciangia lacrimi d'amuri e io priagu sempe, mio Caru Signuri.

*Assettati, haju ancora 'mu ti cuntù;
priastu priastu arrivamu a 'lu puntu!*

*Di 'stí grand'omani chi cuntanu,
li stampi fatti, duve si trovanu?*

*Io criju ca li facisti a' storta,
pecchí cca, nuju li supporta!*

*Minchjuna 'ndavimu in abbondanza,
di chisti non sentimu la mancanza!*

Lu mio cuari ciangia lacrimi d'amuri e io priagu sempe, mio Caru Signuri.

Passamu a cuasi assai importanti!

*'Na vota, di buan'uacchju li briganti,
mò, quandu la malavita ciunca,
lu cuari mio, cridimi, si scianca.*

*Castigu cchjú duru no' 'ndi potivi dare,
la muarti no' si pò mai accarizzare!*

*Cu tutti 'stí diavuli la partita la perdisti,
e chist' amara penitenza 'ndi dassasti!*

Lu mio cuari ciangia lacrimi d'amuri e io priagu sempe, mio Caru Signuri.

'Nta lu mundu ndi sperdisti!

Pane duru, mangiare ndi facisti!

*A' li sventurati nui 'nci damu speranza
pecchí sapimu chi significa sofferenza!*

Ogni tantu, di jocassùpa, porgiandi 'na manu!

Ruscimu 'u 'ndì ripigghjamu chjanu chjanu?

***Lu gaju, la matina, sempe canta,
amaru cu non vole 'mu lu senta!***

***Lu mio cuari ciangia lacrimi d'amuri e io priagu sempe, mio Caru
Signuri.***

Priagu pe tia, cara Terra mia!